

TEKS UCAPAN

**YB DATO' SRI ISMAIL SABRI BIN YAAKOB
MENTERI KEMAJUAN LUAR BANDAR DAN WILAYAH**

SEMPENA

**MAJLIS ANUGERAH PELAJAR CEMERLANG ORANG
ASLI
SPM DAN STPM TAHUN 2015**

DI DEWAN KKLW

21 APRIL 2016, KHAMIS

WAKTU KETIBAAN : 3.00 PETANG

Bismillahirrahmanirrahim

Assalamualaikum WBT

Salam Sejahtera

1. Syukur kita ke hadrat Ilahi kerana dengan limpah kurnia dan izin-Nya dapat kita bersama-sama berkumpul dan bertemu di Majlis Anugerah Pelajar Cemerlang Orang Asli SPM dan STPM Tahun 2015 yang diadakan di dewan yang indah ini.

2. Saya ingin merakamkan ucapan terima kasih kepada Jabatan Kemajuan Orang Asli (JAKOA) yang telah menjemput saya untuk turut hadir bersama-sama dalam majlis meraikan 50 orang pelajar cemerlang Orang Asli dalam peperiksaan SPM dan STPM tahun 2015. Daripada jumlah tersebut, seramai 33 calon SPM berjaya mencapai keputusan 6A ke atas dan 17 calon STPM telah mencapai keputusan Purata Nilai Gred Keseluruhan (PNGK) 2.8 ke atas.

3. Sebelum ini kita telah mengadakan majlis seumpama ini untuk pelajar-pelajar cemerlang UPSR dan PT-3 Tahun 2015 pada bulan Februari yang lalu di mana seramai 67 pelajar cemerlang UPSR dan 91 pelajar cemerlang PT-3 telah diraikan. Suka saya mengambil kesempatan ini untuk mengucapkan tahniah kepada semua pelajar-pelajar, ibu bapa dan guru-guru yang telah bersama-sama membantu pelajar-pelajar Orang Asli ini hingga mencapai kejayaan dalam bidang pendidikan.

Para hadirin yang dihormati sekalian,

4. Kementerian Kemajuan Luar Bandar dan Wilayah (KKLW) amat serius dalam memberi penekanan terhadap pembangunan pendidikan di kawasan luar bandar dan pedalaman khususnya terhadap pelajar-pelajar Orang Asli. Oleh kerana itu langkah-langkah

memperkemarkan hubungan serta kerjasama dengan rakan sinergi seperti Kementerian Pelajaran Malaysia akan diperkukuhkan dari semasa ke semasa. Peranan agensi dan jabatan di bawah kementerian seperti MARA dan KEMAS akan terus dilibatkan untuk meningkatkan lagi akses pendidikan kepada masyarakat Orang Asli secara berterusan.

5. Pihak kementerian melalui JAKOA sentiasa memastikan agar pelajar-pelajar Orang Asli mendapat pendidikan yang terbaik agar dapat melahirkan generasi daripada masyarakat Orang Asli yang akan menjadi pemimpin. Pada tahun ini, seramai 105 pelajar Orang Asli berjaya ditempatkan ke Maktab Rendah Sains MARA (MRSM) setelah mereka mendapat keputusan yang cemerlang dalam peperiksaan UPSR (seramai 40 pelajar) dan PT-3 (seramai 65 pelajar) pada tahun yang lalu.

6. Saya juga dimaklumkan sehingga kini terdapat seramai 786 pelajar Orang Asli sedang menuntut di peringkat IPTA dalam pelbagai jurusan. Mengikut rekod, sejak dari 1971 hingga 2015 terdapat seramai 3,887 pelajar Orang Asli telah Berjaya menyambung pelajaran ke IPTA. Daripada jumlah tersebut seramai 1,812 pelajar berjaya menamatkan pengajian mereka dalam pelbagai bidang.

Jadual : Pelajar Orang Asli yang berjaya tamat pengajian di IPTA

Peringkat Pengajian	Jumlah
Doktor Falsafah	4
Sarjana	24
Sarjana Muda	862

Diploma	459
Pra Diploma	112
Sijil	308
Matrik / Asasi	43
Jumlah	1,812

Jika dilihat daripada jumlah tersebut, kita dapati bahawa masyarakat Orang Asli kini telah mempunyai kesedaran mengenai kepentingan pendidikan.

7. Pada tahun 2016 ini, kita akan memastikan seramai 350 daripada 1,754 calon SPM dan STPM pada tahun 2015 akan menyambung pengajian ke peringkat Institut Pengajian Tinggi (IPT). Selain itu, seramai 33 pelajar cemerlang SPM yang diraikan hari ini telah diangkat permohonan bagi mengikuti Kolej Persediaan Luar Negara untuk dilatih sebagai persiapan sebelum dihantar menyambung pengajian ke luar negara.

8. Pada tahun 2015, kementerian telah menghantar seramai 14 orang pelajar Orang Asli untuk melanjutkan pelajaran ke luar negara di bawah tajaan MARA dalam pelbagai bidang. Sejak program penghantaran pelajar Orang Asli dari tahun 2010 hingga kini, seramai 54 orang pelajar telah berjaya melanjutkan pelajaran ke luar Negara dalam pelbagai bidang seperti bidang kejuruteraan, perakaunan, perubatan dan bidang petroleum.

Para hadirin yang dihormati sekalian,

9. Kita boleh berbangga dengan masyarakat Orang Asli yang dilihat semakin maju dalam bidang pendidikan dan semakin ramai yang mendapat keputusan-keputusan yang

memberangsangkan dalam peperiksaan peringkat UPSR hingga STPM. Saya amat berbangga dengan pencapaian yang ditunjukkan oleh masyarakat Orang Asli dalam bidang pendidikan.

10. Kini, masyarakat umum sudah mula mengiktiraf kejayaan masyarakat Orang Asli. Jika budaya ini disambung oleh pelajar-pelajar Orang Asli yang lain, saya yakin pelajar-pelajar Orang Asli akan menjadi pencabar yang digeruni di dalam pendidikan di negara ini.

11. Kejayaan yang dicapai oleh mereka telah memecah tanggapan negatif masyarakat umum yang selama ini beranggapan bahawa masyarakat Orang Asli terlalu mundur untuk bersaing dengan masyarakat lain. Sudah tentu pencapaian yang diperolehi masyarakat Orang Asli hari ini tidak berlaku secara kebetulan. Ia adalah hasil usaha pelbagai pihak yang telah bertungkus-lumus berusaha untuk mengubah kehidupan masyarakat Orang Asli ke peringkat yang lebih tinggi dan dihormati.

12. Demi membantu masyarakat Orang Asli mendapatkan pendidikan yang sepatutnya, kementerian telah memperuntukkan bajet yang besar bagi memastikan kelancaran pengurusan dan bantuan kebajikan kepada masyarakat Orang Asli untuk mendapatkan pendidikan yang sempurna. Antara bantuan yang diberikan ialah seperti :

- 1.** Bantuan pengangkutan RM13.79 juta
- 2.** Bantuan wang saku RM4.5 juta
- 3.** Bantuan Komputer riba kepada pelajar IPTA RM900 ribu

4. Biasiswa kepada pelajar IPTA RM4.32 juta
5. Bantuan Elaun Makan pelajar IPTS RM270 ribu
6. Bantuan Yuran Persekolahan (Pelajar yang tidak menerima Kumpulan Wang Amanah Pelajar Miskin (KWAPM) RM300 ribu

13. Kementerian juga memandang serius mengenai isu keciciran di kalangan pelajar-pelajar Orang Asli. Oleh kerana itu, kementerian telah menetapkan bahawa JAKOA perlu memberi fokus kepada penurunan kadar keciciran terutamanya dari sekolah rendah ke sekolah menengah. Jika kita lihat kepada statistik kadar keciciran (dari darjah enam ke tingkatan 1) pelajar Orang Asli, terdapat penurunan kadar keciciran iaitu dari 20% pada tahun 2015 kepada hanya 18% pada tahun 2016.

14. Walaubagaimanapun, sasaran ini perlu mendapat sokongan dan kerjasama daripada semua pihak terutamanya daripada ibu bapa dan juga guru-guru. Bagi memastikan sasaran ini berjaya dicapai, JAKOA telah mengatur pelbagai aktiviti dan program pendidikan bagi meningkatkan kesedaran dikalangan ibu bapa dan pelajar-pelajar mengenai kepentingan pendidikan.

Para hadirin yang dihormati sekalian,

15. Saya percaya dengan pelan pendidikan yang memberi fokus kepada pembangunan kemahiran insaniah, sikap dan akhlak mampu melahirkan insan yang mempunyai ilmu dan berkemahiran tinggi. Individu yang mempunyai sikap, pemikiran dan jati diri yang tinggi mampu menawan dunia.

16. Percayalah, masyarakat Orang Asli boleh menguasai peringkat global, jika kita berada pada pemikiran, kefahaman dan halatuju kehidupan yang jelas dan betul. Anak-anak masyarakat Orang Asli terutamanya di luar bandar dan pedalaman perlu diasuh melalui sistem pendidikan terbaik dan jadikan mereka insan baharu yang akan mengubah corak kehidupan masyarakat Orang Asli.

17. Sebelum saya mengakhiri ucapan, sekali lagi saya ingin merakamkan ucapan tahniah kepada pelajar-pelajar yang berjaya. Saya ingin berpesan kepada semua pelajar untuk terus mengekalkan kecemerlangan sedia ada bagi menjadikan masyarakat Orang Asli sebagai masyarakat yang berjaya di negara ini.

Akhir kata, dengan lafaz Bismillahirrahmanirrahim saya merasmikan Majlis Anugerah Pelajar Cemerlang Orang Asli SPM dan STPM Tahun 2015.

Sekian, terima kasih.